

KASA mulakan kerja pembersihan, baiki kerosakan kawasan terjejas

Oleh [Samadi Ahmad](#) - Ogos 20, 2021 @ 12:27pm
bhnews@bh.com.my



Ketua Setiausaha Kementerian Alam Sekitar dan Air (KASA), Datuk Seri Dr Zaini Ujang (kiri) mengadakan tinjauan ke kawasan banjir di sekitar Tupah, Yan dan Titi Hayun, Kedah semalam. - Foto ihsan KASA.

PUTRAJAYA: Kerja pembersihan di kawasan terjejas dengan fenomena kepala air serta banjir di sekitar Gunung Jerai sudah dimulakan agensi bawah Kementerian Alam Sekitar dan Air (KASA) semalam.

Kementerian itu, menerusi hantaran dimuatnaik di laman Facebooknya, berkata Ketua Setiausahanya, Datuk Seri Dr Zaini Ujang juga sudah melakukan lawatan kerja ke kawasan banjir di sekitar Tupah, Yan dan Titi Hayun.

Katanya, Jabatan Pengairan dan Saliran (JPS) sedang giat menjalankan kerja-kerja membaiki kerosakan dan pembersihan di kawasan berkenaan.

"Skop kerja lain termasuk baikpulih infrastruktur sedia ada seperti tebing sungai, loji rawatan air dan jambatan yang mengalami kerosakan teruk.

"Suruhanjaya Perkhidmatan Air Negara (SPAN) dan syarikat perkhidmatan pembetungan nasional, Indah Water Konsortium (IWK) diarah melakukan pemantauan dan pembersihan tangki septik," katanya.

Berdasarkan laporan awal dikeluarkan kerajaan Kedah, jumlah rumah yang terjejas dalam tragedi ini dianggarkan 800 di Yan dan 200 rumah di Tupah, Kuala Muda.

KASA berkata, taburan hujan lebat yang luar biasa dalam tempoh yang singkat di sekitar kawasan puncak Gunung Jerai bermula jam 2.30 petang Rabu antar apunca fenomena kepala air itu.